

# Kajian pastikan peluang jimat tenaga

KUALA LUMPUR 3 Sept. — Perdana Menteri, Datuk Seri Dr. Mahathir Mohamad menyeru pihak-pihak yang berkenaan supaya menjalankan kajian sewajarnya untuk memastikan peluang penjimatan tenaga di dalam sektor-sektor lain termasuk perdagangan dan kediaman dapat dilaksanakan.

Katanya, utiliti-utiliti utama seperti Tenaga Nasional Berhad perlu menolong meningkatkan penggunaan elektrik secara berkesan supaya penggunaan elektrik dapat dijimatkan dengan lebih banyak lagi.

“Demikian juga agensi-agensi kerajaan perlu menolong usaha meningkatkan penggunaan elektrik secara efisien untuk menjadikan negara lebih produktif,” katanya dalam teks ucapan yang dibacakan oleh Menteri Tenaga, Telekom dan Pos, Datuk Seri Sany Vellu ketika pelancaran Perayaan 100 Tahun Elektrik di Malaysia di sini malam ini.

Dr. Mahathir seterusnya berkata, tujuan penggunaan secara efisien ialah untuk mengurangkan kos tenaga elektrik bagi sesuatu perusahaan, yang akan mengurangkan kos pengeluaran dan membantu meningkatkan lagi daya saingan barangan dan perkhidmatan negara ini.

“Sebaliknya penggunaan elektrik hendaklah ditingkatkan supaya industri keluaran dan penyaluran elektrik akan lebih maju. Sebab itulah kerajaan merancang menggunakan kuasa elektrik untuk perkhidmatan kereta api,” katanya.

Perdana Menteri menegaskan, sebenarnya jika kos elektrik dapat dikurangkan, penggunaan lampu elektrik boleh ditambah supaya bandar dan desa menjadi lebih cerah.

Katanya, penggunaan elektrik per kapita mencerminkan kemajuan negara.

“Lebih banyak ia digunakan dengan efisien, lebih majulah negara” tegas beliau.

Dr. Mahathir menambah, peluang bagi pen-

jimatan tenaga khususnya dalam sektor industri adalah sangat besar.

Katanya, kajian yang dijalankan oleh Kementerian Tenaga, Telekom dan Pos menunjukkan bahawa peluang penjimatan adalah sekitar 20 peratus hingga 52 peratus bagi seluruh rangkaian industri di negara ini.

“Peluang tertinggi bagi penjimatan adalah di dalam industri pengeluaran makanan diikuti dengan kayu dan tekstil. Jika industri-industri ini lebih efisien dalam penggunaan elektrik, keuntungan mereka akan meningkat,” katanya.

Perdana Menteri seterusnya menegaskan, penyediaan bekalan elektrik yang tinggi memerlukan tenaga manusia terlatih yang ramai.

“Pembangunan tenaga manusia melalui latihan adalah satu pra syarat penting dalam menjamin pembangunan teknologi yang canggih, sewajarnya satu peningkatan daripada segi kualiti tenaga manusia yang saintifik dan teknikal harus diwujudkan,” katanya.

Sektor elektrik juga, menurut beliau, adalah satu bidang sektor ekonomi yang besar dan penting di mana dijangka pelaburan-pelaburan akan melebihi RM100 bilion dalam 20 tahun akan datang.

“Dengan ini maka terbukalah peluang-peluang bukan sahaja berkaitan dengan kerja-kerja pembangunan penjanaan, penghantaran dan pengagihan, malah dalam bidang pengeluaran peralatan elektrik seperti alatubah-alatubah, suisgiar-suisgiar, kabel dan konduktor,” katanya.

Sempena Perayaan 100 Tahun Elektrik di Malaysia, Dr. Mahathir berharap pihak-pihak yang terlibat akan berazam untuk memperolehi cara-cara terbaru dan radikal dalam penjanaan dan kegunaan elektrik.